

დოკუმენტი დამტკიცებულია  
უნივერსიტეტის რექტორის 2020 წლის 17  
სექტემბრის №მ 23 ბრძანებით

დოკუმენტში ცვლილებები შეტანილია  
უნივერსიტეტის რექტორის 2021 წლის 27  
იანვრის №მ 12 ბრძანებით

*შპს „ქუთაისის უნივერსიტეტი“  
პლაგიატის აღმოჩენის, თავიდან აცილების,  
პლაგიატის შემთხვევაზე რეაგირების  
პროცედურები და მექანიზმები*

## სარჩევი

|  |   |
|--|---|
| მუხლი 1. ზოგადი დებულებები.....  | 3 |
| მუხლი 2. დოკუმენტის მიზანი .....   | 3 |
| მუხლი 3. პლაგიატის სახეები .....   | 3 |
| მუხლი 4. პლაგიატის თავიდან აცილების მიზნით განსახორციელებელი აქტივობები .....                        | 4 |
| მუხლი 6. დასკვნითი დებულებები.....   | 6 |
| დანართი №1.....  | 7 |
| სტუდენტთა წერილობითი ნამუშევრების პლაგიატის პროგრამაში გადამოწმებისა და რეაგირების<br>ანგარიში ..... | 7 |

## მუხლი 1. ზოგადი დებულებები

1. წინამდებარე დოკუმენტი აწესრიგებს პლაგიატის აღმოჩენის, თავიდან აცილების, პლაგიატის შემთხვევაზე რეაგირების პროცედურებს და მექანიზმებს.
2. დოკუმენტის მოქმედება ვრცელდება აკადემიურ/სამეცნიერო/მოწვეულ პერსონალზე და სტუდენტებზე.
3. ამ დოკუმენტის მიზნებისთვის სტუდენტი არის ნებისმიერი პირი, რომელიც სწავლობს უნივერსიტეტში და იღებს შესაბამის საგანმანათლებლო მომსახურებას.

## მუხლი 2. დოკუმენტის მიზანი

დოკუმენტის მიზანია აკადემიური კეთილსინდისიერების პრინციპების დამკვიდრების ხელშეწყობა, ინტელექტუალური საკუთრების დაცვა, უნივერსიტეტში პლაგიატის აღმოსაჩენად ეფექტიანი მექანიზმის დანერგვა და პლაგიატის პრევენცია.

## მუხლი 3. პლაგიატის სახეები<sup>1</sup>

პლაგიატის სახეებია:

- ა) პირდაპირი პლაგიატი - პლაგიატის აღნიშნული სახე გულისხმობს სხვისი ნამუშევრის, იდეის, ფორმულის, გრაფიკის, დიაგრამის და ა.შ. მითვისებას შესაბამისი წყაროს მითითების გარეშე;
- ბ) თვითპლაგიატი - თვითპლაგიატი გულისხმობს, როცა პირი საკუთარ ძველ ნამუშევარს წარმოაჩენს, როგორც ახალს (წყაროს მითითების გარეშე);
- გ) მოზაიკური პლაგიატი - პლაგიატის სახე, როდესაც პირი იყენებს რამდენიმე ავტორის ფრაზას წყაროს მითითების გარეშე და ახდენს მათ კომპილაციას. მოზაიკური პლაგიატის დროს, ნაშრომის ბოლოს მითითებულია ავტორი, მაგრამ ტექსტის კითხვისას შეუძლებელია გარჩევა, სად სრულდება ნაწერის ავტორის ორიგინალური მოსაზრება და სად არის ჩასმული ციტატები;
- დ) პარაფრაზირებული პლაგიატი - პლაგიატის სახე, როდესაც პირი ავტორის მიერ შექმნილ ნამუშევარში გამოყენებულ სიტყვებს ცვლის სინონიმებით, ისე რომ ტექსტის ძირითადი სტრუქტურა და შინაარსი არ იცვლება;

<sup>1</sup> [https://www.osgf.ge/files/2016/Publications/Plagiat\\_-\\_ge\\_-\\_2016.pdf](https://www.osgf.ge/files/2016/Publications/Plagiat_-_ge_-_2016.pdf);

ე) პლაგიატი დაუდევრობით - პლაგიატის აღნიშნული სახე გულისხმობს არასწორ ციტირებას დაუდევრობის გამო. ავტორების ან წყაროების მითითებისას მნიშვნელოვანი ინფორმაციის გამორჩენა ან არევა.

#### მუხლი 4. პლაგიატის თავიდან აცილების მიზნით განსახორციელებელი აქტივობები

უნივერსიტეტი პლაგიატის პრევენციის მიზნით ახორციელებს შემდეგ ღონისძიებებს:

ა) ნერგავს აკადემიური წერის კულტურას;

ბ) აკადემიური/მოწვეული/სამეცნიერო პერსონალისა და სტუდენტებისთვის მართავს საინფორმაციო შეხვედრებს პლაგიატთან დაკავშირებით მათი ცნობიერების ამაღლების მიზნით და აცნობს მათ პლაგიატის აღმოჩენის, თავიდან აცილების, პლაგიატის შემთხვევაზე რეაგირების პროცედურებსა და მექანიზმებს;

გ) პლაგიატის პრევენციის მიზნით გეგმავს სხვადასხვა სახის კამპანიას;

დ) იყენებს ელექტრონულ პროგრამას [StrikePlagiarism.com](http://StrikePlagiarism.com);

ე) უნივერსიტეტის ოფიციალურ ვებ-გვერდზე განათავსებს ინფორმაციას/ინსტრუქციებს პლაგიატის შესახებ.

#### მუხლი 5. პლაგიატის აღმოჩენისა და რეაგირების მექანიზმები

1. ამ წესით დადგენილია პლაგიატის აღმოჩენისა და რეაგირების მექანიზმები, როგორც სტუდენტების, ასევე აკადემიური/მოწვეული/სამეცნიერო პერსონალისთვის.

2. სტუდენტების შემთხვევაში პლაგიატის აღმოჩენისა და რეაგირების მექანიზმები ეხება, როგორც სასწავლო კურსით გათვალისწინებულ წერით დავალებას, ასევე საბაკალავრო/სამაგისტრო/სადოქტორო ნაშრომს და სტუდენტურ/სამეცნიერო კონფერენციებსა და უნივერსიტეტის სამეცნიერო გამოცემებში გამოსაქვეყნებელ მასალას.

2.1. ლექტორი ვალდებულია შესაბამისი სილაბუსით განსაზღვრულ იმ წერით დავალებაში (მაგალითად: რეფერატი, პროექტი და ა.შ.), რომლითაც გათვალისწინებულია წყაროს მითითების აუცილებლობა, სტუდენტის ნამუშევარი შეამოწმოს პლაგიატის პროგრამაზე. პლაგიატის ნიშნების აღმოჩენის შემთხვევაში სასწავლო კურსის განმახორციელებელი აკადემიური/მოწვეული პერსონალის მიერ ხდება სტუდენტის წერითი ნაშრომის განულება. ლექტორი ვალდებულია სტუდენტს მისცეს შესაბამისი უკუკავშირი. სტუდენტი უფლებამოსილია, გაასაჩივროს ლექტორის გადაწყვეტილება ნაშრომის განულების შესახებ.

საჩივრის განხილვა ხდება „ქუთაისის უნივერსიტეტის ეთიკისა და დისციპლინური პასუხისმგებლობის კოდექსის“ შესაბამისად.

2.1.1. პერსონალი, რომლის სასწავლო კურსში გათვალისწინებულია წერიტი დავალება წყაროს მითითების აუცილებლობით, ვალდებულია ყოველი სასწავლო სემესტრის დასრულების შემდეგ წარუდგინოს შესაბამისი ფაკულტეტის დეკანს ანგარიში სტუდენტთა წერილობითი ნამუშევრების პლაგიატის პროგრამაში გადამოწმებისა და რეაგირების შესახებ. ფაკულტეტის დეკანი უნივერსიტეტის მიერ დადგენილი ფორმით (დანართი №1) პერსონალის მიერ მოწოდებულ ინფორმაციას აწვდის ხარისხის უზრუნველყოფის სამსახურს, რომელიც, დადგენილი მექანიზმების შესაბამისად უზრუნველყოფს ანგარიშში მოცემული ინფორმაციის გადამოწმებას შერჩევითობის პრინციპის დაცვით და აწვდის უკუკავშირს ფაკულტეტის დეკანს.

2.2. უნივერსიტეტის სტუდენტთა მიერ შესრულებულ საბაკალავრო/სამაგისტრო/სადოქტორო ნაშრომში პლაგიატის ნიშნების აღმოჩენა ხდება შემდეგი მექანიზმების საშუალებით:

ა) ელექტრონული პროგრამის (StrikePlagiarism.com) მეშვეობით ხდება ნაშრომის ტექსტის შედარება პროგრამაში განთავსებულ სხვა ნაშრომებთან. შემოწმების შედეგად პროგრამა უზრუნველყოფს ანგარიშის შედგენას, სადაც მოცემულია შესამოწმებელი ნაშრომის სხვა მასალებთან მსგავსება. ანგარიში მოიცავს ინფორმაციას იმ დოკუმენტების შესახებ, რომლებთანაც შესამოწმებელი დოკუმენტი ამჟღავნებს მსგავსებას. საბაკალავრო/სამაგისტრო/სადოქტორო ნაშრომის შემუშავების პროცესში, შესაბამისი ნაშრომის ხელმძღვანელი უზრუნველყოფს ელექტრონული სისტემის საშუალებით სტუდენტის ნაშრომის გადამოწმებას. ნაშრომის ფარგლებში, აკადემიური არაკეთილსინდისიერების ფაქტების დადგენის შემთხვევაში, ნაშრომი ეგზავნება სტუდენტს ხელახალი გადამუშავებისთვის ნაშრომის ჩასაბარებლად განსაზღვრული ვადის ამოწურვამდე.

ბ) დასრულებული საბაკალავრო/სამაგისტრო/სადოქტორო ნაშრომის ელექტრონული პროგრამის (StrikePlagiarism.com) საშუალებით გადამოწმების შემდეგ, საბაკალავრო/სამაგისტრო/სადოქტორო ნაშრომის ხელმძღვანელი წარმოადგენს საბოლოო დასკვნას წერილობითი ფორმით.

2.2.1. იმ შემთხვევაში, თუ პლაგიატის ნიშნები აღმოჩნდება კვალიფიკაციის მინიჭების შემდეგ, დისციპლინური კომისია დაინტერესებული პირის განცხადების საფუძველზე შეისწავლის საკითხს, პლაგიატის დადასტურების შემთხვევაში, შესაბამისი კვალიფიკაციის მიმნიჭებელი ორგანო უფლებამოსილია მიიღოს გადაწყვეტილება კვალიფიკაციის გაუქმების შესახებ.

2.3 სტუდენტის სამეცნიერო ნაშრომი/სტატია ექვემდებარება ელექტრონულ პროგრამაში (StrikePlagiarism.com) გადამოწმებას შესაბამისი აქტივობის განხორციელებაზე პასუხისმგებელი პირის მიერ. პლაგიატის დადასტურებისას, პასუხისმგებელი პირი განცხადებით მიმართავს

უნივერსიტეტს აღნიშნული საკითხის განსახილველად. საკითხი განიხილება დისციპლინური პასუხისმგებლობისა და ეთიკის კოდექსის შესაბამისად.

3. აკადემიური/სამეცნიერო/მოწვეული პერსონალის სამეცნიერო ნაშრომში, პლაგიატის ნიშნების აღმოჩენა ხდება შემდეგი მექანიზმების საშუალებით:

ა) ელექტრონული პროგრამის (StrikePlagiarism.com) მეშვეობით პლაგიატის აღმოჩენა, რომელიც შემოწმების შედეგად ადგენს ანგარიშს, სადაც მოცემულია შესამოწმებელი ნაშრომის სხვა მასალებთან მსგავსება. ანგარიში მოიცავს ინფორმაციას იმ დოკუმენტების შესახებ, რომლებთანაც შესამოწმებელი დოკუმენტი ამჟღავნებს მსგავსებას.

ბ) ელექტრონული პროგრამის (StrikePlagiarism.com) მეშვეობით შემოწმების შემდეგ, ხდება სამეცნიერო ნაშრომის ორმაგი ფარული რეცენზირება შემდეგი წესების დაცვით:

ბ.ა) ნაშრომის რეზიუმე ეგზავნება რეცენზენტს;

ბ.ბ) რეცენზენტს არ აქვს ინფორმაცია ვის ნაშრომს ამოწმებს;

ბ.გ) სამეცნიერო ნაშრომის ავტორს არ აქვს ინფორმაცია, ვინ შეიძლება იყოს მისი ნაშრომის რეცენზენტი.

3.1. სამეცნიერო კონფერენციების, უნივერსიტეტის სამეცნიერო გამოცემებში გამოსაქვეყნებელი მასალის, ელექტრონულ პროგრამაში (StrikePlagiarism.com) გადამოწმებას უზრუნველყოფს შესაბამისი აქტივობის განხორციელებაზე პასუხისმგებელი პირი, რომელიც პლაგიატის აღმოჩენის შემთხვევაში განცხადებით მიმართავს უნივერსიტეტს. საკითხი განიხილება დადგენილი წესის შესაბამისად.

4. აკადემიური სიყალბის სხვა ფაქტის დადასტურების შემთხვევაში, დარღვევის სიმძიმის გათვალისწინებით, დამრღვევი პირის მიმართ დისციპლინური პასუხისმგებლობა განისაზღვრება „ქუთაისის უნივერსიტეტის ეთიკისა და დისციპლინური პასუხისმგებლობის კოდექსისა“ და შინაგანაწესის შესაბამისად.

## მუხლი 6. დასკვნითი დებულებები

1. წინამდებარე დოკუმენტი მტკიცდება რექტორის სამართლებრივი აქტით.

2. წინამდებარე დოკუმენტში ცვლილებების, დამატებების შეტანა ხორციელდება საქართველოს მოქმედი კანონმდებლობის შესაბამისად.

